



E fihlile Keresemose

Pitsi Ragoasha

Sepedi



E fihlile Keresemose

E ngwadilwe ke Pitsi Ragoasha
Moswantši Siyasanga Madyibi



koloti Taxi Rank



Go foka moyā wa lethabo, moyā wa matswalo a Morena.

Makwena le bana ba eme moralading wa batho bao ba emetšego dithekisi tša go ya toropong.

Makwena le bana ba ya go reka diaparo le dijo tša keresemose.

Ba be ba se ba emela gore batho e tla ba ba bantši ka tsela ye.

Ba tla pitlagana le bana ka thekising ka gore ba nyaka go fihla toropong ka pela.

Baotledi bona ga ba na taba le pitlagano yeo, sa bona ke go amogela tšhelete fela.

KERESIMOSE E BOTSE



Ka toropong ke semphete batho ba tlide
ka bontši.

Ka mabenkeleng go kgabišitšwe ka mehlare
yeo e apešitšwego dipataka tša mebalabala.

Barekiši ba bangwe ba eme mejako ka
dijase le dikefa tše dikhbedu, ka maledu a
matelele a mašweu.

Bana ba Makwena ba thakgaletše go bona
“Tate Keresemose” efeela ba bangwe ba
mo tšhaba.

Makwena yena o kgahlwa ke ge bana ba
gagwe ba raloka le “Tate Keresemose” e
feela nako ga e gona.

Ba na le dilo tše dintši tšeо ba swanetšego
go di dira pele mabenkele a tswalelwа.



Barekiši bona ba letša diletšo tša
mehutahuta e bile ba dira le manka a go
leka go goketša bareki.

Ba a goeletša bare, “Tsena ka gare dilo
di wele, ge o reka tše pedi o hwetša e
tee mahala.”

Tate keresemose yena o gokara bana a eya
le bona ka lebenkeleng go ba fa dimpho le
dimonamonane.

Makwena o leka go fokotša nako ya bana
le tate keresemose feela ba ganelela
go yena.

Bona ba iphina ka go raloka ebile ga ba
sa gopola gore ga botse ba tletše eng
toropong.

Makwena o feleleditše a kgopela mong wa
lebenkele gore a fihle tate keresemose gore
bana ba sepele.



Makwena ke gona a lemoga gore ke ka lebaka la eng bana ba be ba llela go tla naye toropong.

Ba be ba kgantšheditšwe ke bana ba bangwe bao ba kopanego le Tate keresemose.

Makwena o ikhwetša a le ka fase ga kgatelelo ka gore o sa šaletšwe ke dilo tše di ntši.

Kudu ka gore toropo le yona lehono ga e sepelege e nyeuma batho feela diterateng.

Bana ba tšama ba thumana le batho e bile ba šalela morago ge ba bona seo se ba kgahlago.



Makwena le bana ba rile go tšwa ka mo lebenkeleng ba leba lebenkeleng la dieta.

Ka ge a be a fela pelo Makwena o nyakile go lahlegelwa ke ngwana tseleng.

Yena o rile ge ba tshela robotong le bana, ngwana yo mongwe a bona roboto e hwibila a gomela morago.

Makwena o lemogile ge ba fihla robotong ya bobedi gore Matome ga a gona.

Bahlapetši ba tsela ba šetše ba mo topa a gakanegile gomme ba mo iša tenteng ya bona.

Mahlatse ba hweditše difoune tša Makwena ka morabeng gomme ba mo founela.



Tšeо di diregago ka toropong ka nako ye
go di bolela ke go kwa mpa mokhoro.

Mmatlou le monna bona ba tlide le bana
toropong go reka dilo tša keresemose.

Ba ile go lapišwa ke go sepela le bana ba
ba notlelela ka koloing ya ba ge ba ile.

Letšatši le be le fiša kudu gomme bana ba
kotsing ya go tšoša.

Bana ke ge ba kolobile ka dikudumela ba
sa tsebe gore ba tla tšwa kae.

Makwena o rile ge a bona batho ba
kgobokane a akamela gomme a se kgolwe
maahlo a gagwe.



Makwena o ile a se senye nako gomme a
leletša maphodisa mogala.

Maphodisa ba ile ba tla gomme ba pšhatla
mafasetere ba ntšha bana ka koloing.

Makwena ke ge a befetšwe kudu gwa
swana le ge e be ele bana ba gagwe.

O ile a kgopela maphodisa gore ba bule
molato wa tlaišo ya bana gomme yena o
tla ba tlhatse.

Mmatlou le Lekau ba rile ge ba fihla lešaba
lela la ba kgeregela, ya ba thibang thibang.

Mahlatse maphodisa a ile a kgon a go ba
lamolela efeela ba ba tanya ka ditšhipi.



Ka lebenkeleng la dieta tša bana la
Lahlaketope ba hweditše go pitlagane kudu.

Makwena le bana le bona ba gapeletša go
tsena ka gare go lekentšha dieta.

Popoti le Kokoti ba ile ba thakgala ka gore
ba hweditše dieta tšeо e lego kgale ba
di nyaka.

Pontšho le Matome bona ba ile ba nyama ka
gore tšeо ba bego ba di nyaka di be di fedile.

Makwena o ka fase ga kgatelelo ka gore
o be a gopotše gore bana ka moka ba tla
hwetša dieta.

Bjale ga a sa tseba gore ge ba paletšwe ka
mo ba tla ya ba di hwetša kae.

Dietat ts a GaGo



Ge ba fihla ka lebenkeleng la bobedi gona
Makwena a hlakahlakana le go feta.

Pontšho o hwa kgaba ka gore dieta tše o
bego a di rata ga di mo lekane.

Morekiši le yena o šetše Makwena morago
ga a nyake go mo katologa.

Le ge dieta di sa lekane Pontšho e le tše di
nyenyane, o re di lokile di tla butšwa.

Ge e le tše di kgolo go yena o re Makwena
a se tshwenyege o tla gola natšo.

Morekiši yena o lebeletše tšhelete ga a na
taba le gore dieta ke tša keresemose.



Ka lebenkeleng la dibapadišwa la
Mphemphe le gona ke sephethephethe.

Mejako barekiši ba letša dikwetekwete ba
goeleta ka dihlaboša mantšu bare ditheko
ditheositšwe.

Dibapadišwa tše di ntši di pharilwe
dithekethe tša gore 50% e fokoditšwe.

Bontši bja batho bo holofetše gore di
sephešaleng empa Makwena yena ga a
kgahlwe ke selo.

O lemogile gore ditheko ga di fapanie le tša
mathomong a ngwaga mola a tlile ka mo.

Bana bona ga ba na taba le ditheko ba
topa ba tšhela ka teroling le ge Makwena a
ba ganetša.

Letsatsi

LEBENKELE



Ka lebenkeleng la dijo la Modulathoko le gona e be ele mathata.

Barekiši ba be ba laetšwe gore ba se dumelele bana ba ka fase ga mengwaga ye lesome.

Makwena o ile a makala a ba a befelwa ge a ekwa taba ye.

Barekiši ba ile ba mo hlalosetša mabaka ao a dirilego gore lebenkele le tšeye sephetho se.

E feela yena o ile a latelela mong wa lebenkele a mmotšiša gore molao wo o go tšere kae.

Mong wa lebenkele o ile a feleletša a dumetše gore Makwena a tsene le bana.

Batho ka moka ba ipata ka yena le bona ba tsena le bana.



Lefelo le lengwe leo batho ba le ratago
kudu ka dinako tše ke kua diphakeng.

Bontši bja batho ge ba lapišitšwe ke go
sepela toropong ba ya go ikhutša fao.

Ka nako ye ya keresemose diphakeng go
tlala mašabašaba a batho bao ba tlilego
go itapološa.

Ba dula bjanyeng bjo botalana meriting
ya mehlare yeo e apešitšwego malente a
mebalabala.

Ka thoko ye nngwe ke madiba a meetse ao
a akometšwego ke mehlare ye metelele.

Makwena le bana ba gagwe le bona ba ile
ba ya phakeng go ikhutša.



Batho le bona ba iketlile, ba beša dinama,
ba a ja, ba a nwa, ke lethabo feela.

Bana ba kitima kitima le phaka ba
namela dilo tša go dikologa le tša go
fofišetša godimo.

Bana ba Makwena le bona ba ile ba thoma
go namela dibapadišwa ba fologa bjalo ka
bana ba ba bangwe.

Ba fela ba kgaotša bae ya go binela
diletšwa tše di be go diletšwa gona fao.

Ba bangwe e be e le dikgwari tša mmino
mola ba bangwe ba re sa koša ke lerole.

E fehlile keresemose go letšwa mmino
wa diopedi tša ngwaga wo ba re” haka
Matorokisi haka!”



Ba tša tšhireletšo le bona ba ntšhitše
mahlo dinameng gore batho ba bolokege.

Ba hlokometše kudu bana le mahodu le
ba go nwa bjala bošaedi.

Makwena o ile a lemoga ka pela gore
kotsi ye kgolo go bana ke ge ba ralokela
kua kgauswi ga madiba.

Ge a bona bana ba bantsi ba ralokela
kgauswi ga madiba o ile a se sa iphina
ka selo.

Mafelelong o ile a swara lekgotla le
batswadi gomme a ba lemoša kotsi
ya meetse.

Are bana ba bantsi ba lobile maphelo
a bona ka nako ye ka labaka la go
thakgala kudu.



OBE LE LEETO
LE BOTSE

Letšatši bjale le rapame gomme
dinamelwa tša go boela magae di thomile
go rwala batho.

Makwena le bana ba šušukile merwalo
ba lebile fao dinamelwa tša gabon di
emago gona.

Bana bona ba iphinne ka tša ka toropong
ba duma ge nkabe ba se sa ya gae.

Lehono ba ka se robale ba tla ba ba fela
pelo ya gore keresemose e fihla neng.

Makwena yena o nyaka go fihla a hlwekiše
legae a be a apeye ka gore gosasa ba na
le baeng.

Kudu ka gore bošego bja lehono o
swanetše go ya le bana kerekeng go
keteka matswalo a Morena.

TUMELELO

E ngwadilwe ke
Pitsi Ragoasha

Moswantši
Siyasanga Madyibi

Molekodi 1
Pandelani Claudine Rambau

Molekodi 2
Isabel Seakamela

Molekodi 3
Irene Masemola

Mohlami
PixelPing Design



ISBN 978-1-920702-19-9



basic education

Department:
Basic Education
REPUBLIC OF SOUTH AFRICA



LET'S GET SOUTH AFRICA READING

